

A Tx'an Libro

ECLESIASTÉS

Masanil tzet yetal c'am wal jabok yelapnok

- 1** ¹⁻²A ton juntzan is k'anej cham alom el k'anej ti', a ton c'ajol David max yak' reyal bay Jerusalén.
¡Nabac'al, nabac'al! ¡Masanil tzet yetal c'am jabok yelapnok!
- ³ ¿Tzet chi yi eb anima yin xiwil mulnajil chi watx'nej eb bay yulyibank'inal ti'?
- ⁴ Ay mac chi alji, ay c'apax mactxel chi cami, a pax tx'otx' tx'otx' xin, ayc'al ec'ok.
- ⁵ Chi ajol c'u, cax chi tojpax can junelxa. Caytu' chi yun tojcan bayc'alta' chi eq'ui yet chi meltzoj yaj pax ul junelxa.
- ⁶ Chi toj cak'lek' bay sur, cax chi meltzoj pax can tok bay norte. Chi ec'c'al xuyuyok cak'lek' tu', cax chi meltzoj pax yintak junelxa.
- ⁷ A masanil a' aej, chi tojcan a' bay a' mar; palta a' mar tu', c'am yechel chi nojcan el a'. Chi meltzojpax a' aej tu' junelxa bay chi ajc'alta' ul is nuk', ac'ala' chi toj pax a' yul is be junelxa.
- ⁸ A yuj masanil tzet yetal toxac'al chon caktzaj aj yuj, c'amxa yalbanil jantak chi yun co caktzaj ajok, c'am bak'in chi jala' tol k'okbilxa co matz'li; c'am c'apax bak'in chi jala' tol k'okbilxa jabení.
- ⁹ A masanil tzet yetal ay tinani', ayxac'alta' yet payxa. C'am junok tzet chi jun tinani' tol maj yun eb anima yet payxa. C'am tzet yetal tolto chi txecløj ajok.
- ¹⁰ Ayc'alta' mactxel chi aloni: A jun ti', caw wal ac'to, xi mi. Palta a junok tzet yetal tu', ma txequel jayebxam abil ayxa jun tu' yet c'am onto ayon ti'.
- ¹¹ A juntzan tzet yetal yettaxc'alta' payxa, mayal tojcan c'ayc'ulal juj. Caytu' ok yun tojcan c'ayc'ulal juntzan tzetak yetal lananto jayoc co satak yuj eb anima yet yajtok tu'.

A tzet yojtakxa cham chi yala'

¹²Ayin chin k'anjab ti', max in oc reyal bay in conob Israel bay Jerusalén. ¹³Max quin oc wal ijan in sayon willa', c'al in cuyon yin jelanilal masanil tzet yetal ay bay yulyibank'inal ti'. Caw wal manxa yalilok ikatz max yaoc Dios jiban ayon anima on ti'. ¹⁴Catawal tu' max nachaj el wuj tol a masanil tzet chi jun bay yulyibank'inal ti', nabac'al, c'am wal jabok yelapnok, axcaxac'al tol chi jak' jip co mitx'on cak'ek'.

¹⁵A tzet yetal tol coxanc'alta'a, c'amxa chi je' co tojlonen ocok, c'am chi je' co bison tzet yetal tol c'am.

¹⁶⁻¹⁷Catatu' chin naon yul wet axca ti': Ayin ti', caw wal mimek winak in yalon eb anima, yelxac'al jelan in yintak eb max ec'lej yin reyal bay Jerusalén ti'. Caw wal aj nabal in, xiwil c'apax tzet wojtak. Max in oc wal ijan in beyc'ulneni, tzet wal is q'uexanil jelanil yetok c'am nabalil, c'al yob nabalil, max wiltek, axca wal cak'ek' tol c'am chi je' co mitx'oni, caywal tu' juntzan tu', c'am chi je' co nabalnen elok, quin chi. ¹⁸Wal yel ta chi aj can co jelanil, chi aj c'apax can co bilc'ulal. Ta chi ajc'al can jojtaknen elok, chi aj c'apax can jaben yail.

2 ¹Max in nabalnej wal el wak'on in nabal, cax max in beyc'ulnen elok, baytal yin ay tzalojc'ulal, palta max wilon xin, tol a masanil juntzan ti', c'am wal jabok yelapnok. ²Xan a chi wut wilon xin, tatol asan chi co say tzetbil chi yun yoc tze', ti tol c'am co nabal yin axca tu', c'al yin jak'on co nabal, nabac'al toni.

³Max wak'lej wal wak'on tzalojbok in c'ul yetok vino, max wuten in ba yin c'am nabalil; palta naanc'al wuj tol a in jelanil chin ikbani. Max wochej wal max wojtaknej elok, tzet yetal tol miman yelapnok chi junej, yak'ban iquis on jayebok c'ual ti'.

⁴Caw wal xiwilxa tzet yetal tol mimek yayji oc max in watx'nej. Max in watx'nej aj watut, xiwilxa wawoj uva. ⁵Max in watx'nej juntzanxa wawoj, c'al juntzan in parque. A bay tu' max waw masanil makanil te te' chi yak' sat. ⁶Max in watx'nej c'apax bay chi wajay a' aej yet chi waoc yal juntzan wawoj te' tu'. ⁷Max in man eb nak in chekbej, c'al eb ix in chekbej, toltax ay eb in chekbej max alji bay watut; yetok c'apaxok, xiwilxa max yun in wacax, c'al in calnel yintak juntzanxa eb maxax ec'lej bay Jerusalén yet yalantok. ⁸Manxa orook, c'al plataok max in wajbaj ec' bulanok, tol titnak yin is beyomal juntzanxa rey bay juntzanxa nacionlak. Ay c'apax eb winak, c'al eb ix ix max bitni ayin, a ton masanil juntzan tu' chi yochej eb jet animail. Xiwil c'apax max yun eb xal ix wuj, txololixac'al jay eb.

⁹Caw wal mimek winak max wunej. Yelxac'al xiwilxa tzet yetal ay ayin yintak masanil eb max ec'lej yet yalantok bay Jerusalén ti'. Caxc'al ay masanil juntzan ti' ayin, palta maj c'ayil in jelanilal. ¹⁰C'am tzet yetal tol max yochej in c'ul tol maj wi'. C'am c'apax junok tzet yetal tol maj wunej. Max wak' tzalojbok in c'ul yetok masanil in mulnajil, a ton jun tzalojc'ulal tu' max oc paktzebalok ayin.

¹¹Lajwi tu', max wilon oc masanil in mulnajil max in watx'nej ti', a ton juntzan mulnajil tol yatakil max yun watx'ji wuj, caytu' max yun nachaj el wuj tol a masanil juntzan tu', c'am wal jabok yelapnok. Lajanxac'al axca jak'on jip co mitx'on cak'ek', c'am junok tzet yetal tol watx' chi ji' bay yulyibank'inal ti'.

¹²Lajwi tu' max wilon paxok tzetbil wal yayji oc jelanilal, c'am nabalil, c'al yob nabalil. ¿Tzetto wal yetal ok yun junokxa ok yak' yajawilal wintak ayin ti'. Tok ayto tzet c'amto chi uj yettaxc'al payxa? ¹³Catatu xin, max nachaj el wuj, tol a jelanilal yelxac'al watx' yintak yob nabalil. Axca wal sakk'inal, yelxac'al watx' yintak k'ekk'inal.

¹⁴A mactxel aj nabal, caw wal watx' yilon bay chi eq'ui. A pax mac tol c'am is nabal xin, axca tol xol k'ekk'inal bay chi ec'jabi. Palta axa yet max nachaj el wuj xin, lajanc'al chi yun yelcan apnok ca makanil. ¹⁵Cax max walon yul wet: A tzet yetal chi echbanen junok c'am nabal, a chin echbanen c'apax ayin ti', yuj tu xin, c'am wal jabok tzet ok oc in jelanil ti', toltax masanil juntzan tu' c'am wal jabok yelapnok. ¹⁶Yujtol c'am junok mac ok nalaytek, tamwal eb jelan, tamwal eb c'am is nabal. A yet chi beyc'altok tiempo, masanil chi tojcan c'ayc'ulal. A eb jelan, c'al eb c'am nabal, ok camc'al eb, quin chi.

¹⁷Axa wal chi yun ajok, c'amxa yopiso wiquisal wuj. Yujtol a masanil tzet chi wun bay yulyibank'inal ti', toc'al chin caktzaj aj yuj. Wal yel, c'am wal jabok yelapnok masanil, lajanxac'al axca tol chi jak' jip co mitx'on cak'ek'. ¹⁸Chi lajwi tu', axcaxac'al tol majxa wochej masanil juntzan in mulnajil max in watx'nej bay yulyibank'inal ti', yujtol a masanil juntzan tu' ac'al mi bay junokxa ok occan yin wopiso ti', a tu' ok canok. ¹⁹Yujtol c'am mactxel yojtak ma tol jelan, ma tol c'am is nabal jun mac ok ion can in mulnajil ti', tol yin yatakilal, c'al yin ajnabalil max yun wion bay yulyibank'inal ti'. Nabac'al mi in mulnajil chi yal tu'.

²⁰A wal yet chi wilon masanil tzet yetal max in watx'nej bay yulyibank'inal ti', toxac'al chi na ba in c'ul yuj xiwilxa max wetnej in c'ul yin mulnajil. ²¹Ay mactxel chi yaoc is jelanil, is yajnabalil, c'al tzet yojtak yin is mulnajil, asan chi can bay junokxa tol maj yab yail mulnajil jabok; axa chi ion can masanil juntzan tu', xan nabac'al is mulnajil, cax man moxok axca tu'.

²²Yuj tu xin, ¿tzet wal chi yi' junok anima yuj xiwil chi mulnaji c'al xiwilxa chi yak' bilc'ulal bay yulyibank'inal ti'? ²³Masanil tiempo bilc'ulalc'al yayji, al chi yab axca wal junok ikatz. Tamwal yet ak'balil chi xew janic'ok is nabal, xan a jun ti' nabac'al c'apaxok.

²⁴A wal jun tzet yetal tol watx' chi yun eb anima, asan tol chi low eb c'al yuq'uena' eb, c'al yak'on tzalobjok eb c'ul yin is mulnajil tu'. Max nachaj wal el wuj, tol a yin axca tu' a bay Dios chi tita. ²⁵Yujtol, ¿mac wal junok chi je' tzalobji c'ul lowi, ta man yujok Cham? ²⁶Wal yel asan Dios chi ak'on jelanilal, ojtakbilal, c'al tzalojc'ulalil bay mac chi tzalobji c'ul Cham yilon ocok. A pax

bay mactxel yobtakwom xin, a wal chi ak'lay mulnajil bayc'al wajban ec' bulan tzetak yetal, yet chi ak'lay bay junok tol watx' satak Dios. A juntzan axca ti' c'apaxok nabac'al, lajanxac'al axca tol chi jak' jip co mitx'on cak'ek'.

Masanil tzet yetal ay is c'ual

3 ¹Masanil tzetak yetal ay is c'ual, masanil tzet yetal ay bay yulyibank'inal ti', ay is yorail:

²Ay is c'ual yet chi oc aljil, ay is c'ual yet chi oc camich. Ay is c'ual yet chi awlay awoj, ay c'apax c'ual yet chi oclay aj awoj awbil.

³Ay is c'ual yet chi mak'lay cam anima, ay c'apax is c'ual yet chi antelay anima. Ay is c'ual yet chi uchlay ay junok tzet yetal, ay c'apax is c'ual yet chi watx'nelay ajok.

⁴Ay is c'ual yet chi oc ok'il, ay c'apax is c'ual yet chi oc tze'. Ay is c'ual cusc'ulal, ay c'apax is c'ual yet chi oc k'in.

⁵Ay is c'ual yet chi uchlay saklem juntzanok ch'en ch'en, ay pax is c'ual yet chi wajlay oc ch'en. Ay wal is c'ual yet chi oc lak'lejibail, ay pax is c'ual yet c'am chi oc lak'lejibail.

⁶Ay is c'ual yet chi saylay tzet yetal, ay c'apax is c'ual yet chi beklay c'aytok. Ay is c'ual yet chi c'ubelay aj tzet yetal, ay pax is c'ual yet chi k oklay elok.

⁷Ay is c'ual yet chi nic'laytok junok k'apej, ay c'apax is c'ual yet chi tz'islaytok. Ay is c'ual yet tz'inc'al con chi, ay pax is c'ual yet chon k'anjabí.

⁸Ay is c'ual camc'ulal, ay c'apax is c'ual ajc'ulal. Ay is c'ual yet chi oc owal, ay c'apax is c'ual yet chi oc junc'ulal.

⁹¿Tzet wal chi yi' anima yin yuj xiwil chi mulnaj eb? ¹⁰Chi wil wali, jantakxa mulnajil max yak' Dios yun eb anima. ¹¹Caw wal watx' max yun watx'nen Dios masanil tzet yetal ta chi uj yin is c'ual. Max yak' jochwan yin jojtaknej el tzetak yetal, yet yajtok tu', palta c'am chi yak' nachaj el juj wal yin sic'libil tzet chi yun Cham.

¹²Max wojtaknej elok tol c'am junokxa tzet yetal yelxac'al watx' chi je' juneni, asan tol chon tzaloji, cax watx'c'al tzet chi junej yak'ban iquis on. ¹³Tol junjun on chon lowi, c'al juq'uenal, cax chi jak'on tzalojbok co c'ul yin masanil tzet yetal chi yak' co mulnajil, yujtol a Dios chi ak'on ayon. ¹⁴Yetok c'apaxok, max wojtaknej elok tol a masanil tzetak yetal max watx'nej Dios, ayc'al ec' yin tojbalk'inal. C'am tzet chi je' yalay oc tz'akil, tamwal ay tzet chi je' yilay elok. Max yut Dios axca tu', yet watx' chon oc yin ayilal bay. ¹⁵A masanil tzet yetal ay tinani', ayxac'alta'a. A pax tzet yetal ok jayok, toc'alta' ay yet payxa, toc'al chi meltzojtakbi yuj Cham.

A tzet yetal man tojolok chi beybálnelayi

¹⁶Cax max wilon c'apaxok, tol a bay yulyibank'inal ti', a yet chi beyc'ulnelay eb anima, bay is moj wal tol ay watx'il, c'al tojolal, palta

asan tzet yetal man watx'ok chi uji. ¹⁷Yuj wal tu' xan chin na' tol a Dios ok on beyc'ulnen el ayon anima on ti', caxc'al watx' on ma yob on, yujtol a masanil tzetay yetal c'al masanil tzet chi uji, ok ajapnok is c'ual yin beyc'ulnelayi.

¹⁸Cax chi walon c'apax yuj co beybal ayon anima on ti', tol a Dios chon ak'on porobal, yet chi nachaj el juj tol lajan on axca no no'. ¹⁹Wal yel ayon anima on ti', c'al no no', jun lajanc'al chi yun co lajwi ayok, chi cam no' cax chon cam c'apaxok, cax jun lajanc'al chi yun jion co cak'ek' yetok no', man ec'banok chi yun jion jet yintak no no', yujtol masanil tzet yetal c'am yelapnok. ²⁰Junnej lugar bay chon apnican oc co masanil yetok no no', yujtol a yin pokok max con tita. Ac'ala' bay pokok tu' ok on meltzojpax cantok. ²¹¿Mactxel chi je' tec'ban ba yaloni, tatol a janimail tol chi toj bay satcan, axa is yiquisal no no' chi tojcan bay najatil yich tx'otx' tx'otx'? ²²Max nachaj wal el wuj tol c'am junokxa tzet yetal watx' chi Junej, asan tol chi jak' tzalojbok co c'ul yin tzet yetal chi ji' yin co mulnajil, yujtol caytu' yayji oc jiban. ¿Mac ok ak'on jojtaknej elok tzet ok uj yet mayal on cami?

4 ¹Max watok in nabal yin masanil tzet yetal man watx'ok chi uj bay yulyibank'inal ti'. Max wilon xin, tol a eb chi etnelayi, caw wal tol chi ok' eb, palta c'am mac chi colon el eb, yujtol a juntzan etnewom tu', a ton eb ay yikbej. ²Yuj tu' xan max in na' tol yelxac'al watx' yet eb mayal cami, yintak eb iquisto. ³Watx' yet mac c'amto chi alji yintak eb ti', yujtol a mac c'amto chi alji tu', c'amto chi yil masanil tzet yetal man watx'ok chi uj bay yulyibank'inal ti'.

⁴Max wila' tatol miman chon mulnaj bay yulyibank'inal ti', cax ta chon ajc'al can yuj, chi oc juntzanxa ajc'ulal jin yuj. Nabac'al co mulnajil chi yal tu'. Lajanxac'al axca tol chi jak' jip co mitx'on cak'ek'.

⁵Chi ali tol asan eb c'am nabal toc'al ayic'ok, c'am tzet chi yunej, chi yak' cam ba yuj wajil. ⁶Palta ayin ti' chi wal axca ti': Yelxac'al watx' ta janic'nej tzet ay yul co k'ab, palta tol tzalojc'ulal ayon, yintak pax tol miman tzet yetal ay ayon, tol chi ji' yin bilc'ulalil, axca tol chi jak' jip co mitx'on cak'ek', quin chi.

⁷Max wilon junokxa tzet yetal chi uj bay yulyibank'inal ti', tol nabac'al. ⁸Ay mactxel tol tx'oklilc'al, c'am yuninal, c'am yux'tak, palta c'am wal junok bek chi xewi, c'am wal jabok chi bek yilon oc is beyomal, tamwal chi na' yalon yin is nabal axca ti': ¿Mac yuj xan xiwil chin mulnaji? ¿Tzet yuj xan tol chi wetnej in c'ul? man xiok. A yin axca tu', nabac'al, toc'al chi jetnej co c'ul.

Miman chi ji' ta chi co waj co ba

⁹Watx' tatol Junej chi mulnaj cawan anima yintak tol asan jun, yujtol axca tu', miman tzet yetal chi yi' eb yin is mulnajil. ¹⁰Ta chi ayc'ay junok eb tu', axa junxa tu' chi ion aj wan. Palta ta a junok anima is tx'oklil, a

wal yet chi ayc'ayi, tok ayto mactxel chi ion aj wanok. ¹¹Yetok c'apaxok ta a cawan anima tu' junej chi way eb, chi mojlej k'añnaj ba eb, palta ta asan junok anima tx'oklil, ¿tzet wal ok yun k'añnaj ajok? ¹²Suboj c'apax yayc'ay junok tx'oklil yuj ajc'ul, a pax ta cawanok xin, chi je' tec'ban ba eb, ilab c'apax junok lasu oxeb yayji, man subojok nic'chaji.

A jelanilal ti' man yujok ayxa co k'inal

¹³Yelxac'al watx' junok ach'ej aj nabal, yintak pax junok rey tol icham winakxa tol c'am nabal, c'amxa chi cha yab nabalej. ¹⁴⁻¹⁵Caxc'al mi a nak ach'ej tu' petoj yul preso, ma yin mebilal ay, yet chi oc yin reyal, max wila' tol masanil anima chi aloni, tol watx' a nak ach'ej tu' chi occan yin reyal q'uexelok cham icham winakxa tu'. ¹⁶Palta caxc'al mi c'amxa chi bischaj bisil conob bay chi yak' nak reyal, c'am chi canc'al eb yin tzalojc'ulal yetok, tamwal eb yinatil eb. A masanil juntzan tu' nabac'al. A yin jak'on jip jak'on tzalojbok c'ul masanil eb anima jin, axq'uijan wal tol chi jak' jip co mitx'on cak'ek'.

Ak' yun bay chak' a ti'

5 ¹A yet chach toj bay templo Dios, chi cam a naoni. Yelxac'al watx' tol cha jitztek a ba yet chabeni, c'al ekeni; yintak pax tol toc'al chak' a xajanbal, axca chi yun eb c'am nabal, c'am chi na eb ta yob chi yunej.

²Chi cam wal a naon yin babelal, catatu' chak'on a ti' bay Dios yin tzet chak' bay, yujtol a Dios, atac'al bay satcan ay, axa ach xin, a bay sat tx'otx' ti' ayach ec'ok. Yuj tu' xan man comonok chach k'anjabi. ³Yujtol a yin xiwil tzet yetal cha na', chach ilwaj aj yuj, c'al yuj xiwil chach k'anjabi, ayxac'al k'anej c'am yelapnok chala'.

⁴A yet chak'on a ti' yin junok tzet yetal bay Dios, manchak mayji ak'on yunej, yujtol c'am chi cha' c'ul Cham eb comonc'al chi yala', xan ak' yun bay chak' a ti'. ⁵Yel mi watx' tol c'am chak' a ti', yintak pax tol chak' a ti' cax c'am pax chak' yunej.

⁶Manchak aoc a mul yuj tzet chala', chi lajwi tu' cax chalon satak is chekbej Dios tol ayach tok yin c'ayc'ulal max aloni. ¿Tzet yuj xan cha tx'em yowal c'ul Dios yuj tzet chala', cax chi yak'on lajwok ay Cham tzet yetal max onej? ⁷Tatol toc'al cha na' tol miman tzet ok a watx'nej yin yet Dios, ma xiwil tzet chala', c'am pax chonej, nabac'al; palta watx' tol miman yelapnok Dios yul a sat.

Tzet yetal c'am chi chalej ba

⁸Manchak c'ayaj a c'ul tatol a bay junok nación chela', tol caw wal chi etax eb meba'; c'am chi ikelay tojolal, yujtol a eb ay yopiso, chi col-lay yuj juntzanxa eb caw wal mimek yikbej; axa juntzanxa eb tu' chi col-lay eb yuj junokxa yelxac'al miman yikbej. ⁹A ton juntzan tu' tol chi yak' eb yik yajbanilal can conob, c'al tol chi taynej cham rey eb comon anima.

¹⁰A mactxel tol ay is came'ulal yin ch'en tumin, tol chi ajc'al can yocheni. A mactxel ay is came'ulal yin beyomal, c'am yechel tol ok na' tol k'okbilxa tzet yetal ay bay. Nabac'al chi yetnej eb c'ul. ¹¹Yujtol ta mimanxa tzet yetal ay bay junok mactxel, miman c'apax tzet yetal chi c'aya'. Asan wal tzet yetal chi yi' yin, asan tol chi yil yec' yul k'ab. ¹²A junok mactxel tol chi mulnaji, txennej chi yun lowi ma miman chi yun lowi, palta yin wal junc'ulalil chi wayi. A pax junok beyom xin, c'am chi way yuj bilc'ulal yuj is beyomal tu'.

¹³Ay wal jun tzet yetal tol cusc'ulaltak yayji oc max wil bay yulyibank'inal ti': Tol ay mac tol toc'al chi wajbaj ec' bulan is beyomal, palta ac'al oc is beyomal tu' chi iontek cusc'ulal yiban. ¹⁴K'inalok ta a junok txon man watx'ok, chi je' lajwi ay juntzan beyomal tu' yuj. Tatol a jun ay yet tu' ay junok is c'ajol, axa yin tzunanil c'amxa tzet yetal chi je' yak'oncan bay. ¹⁵Axcac'al chi yun jalji bay yulyibank'inal ti', cac'al tu' chi yun co toj paxok. T'iran on elok chon alji, axa yet chon meltzoji c'am wal jabok co mulnajil chi jitok. ¹⁶A ton jun ti' cusc'ulaltak co naoni. Yujtol axcac'al wal max yun yalji jun beyom tu', ac'ala' caytu' yili yet ok tok paxok. Tokwal ay tzet chi yi' yin yujtol miman chi mulnaj xin. ¹⁷Ak'xa xin, xol xiwc'ulal chi lowi, yak'ban iquis ec' bay yulyibank'inal ti', xiwilxa bay chi yetnej c'ul yaben yail, c'al xiwil is bilc'ulal.

¹⁸Asan wal jun tzet yetal watx' max wil bay jun yulyibank'inal ti', asan tol chon lowi, chi juc'a', cax chi jak'on tzalobjbok co c'ul yin tzet chi ji' yin co mulnajil, yak'ban ay janic'ok co cawil chi yak' Dios cayti', asan ton jun ti' chi ul junej. ¹⁹Yetok c'apax junxa ti', tatol a Dios chi ak'on mimanok co beyomal, yuj co looni c'al juq'ueni xan chi yak' ayon; a chi ak'on c'apax jak'on tzalobjbok co c'ul yin co mulnajil tu'. Is watx'c'ulal Dios jun tu'. ²⁰Yak'ban a Dios chi ak'on co tzalojc'ulal yin co mulnajil tu', tok chon oc il yuj tzetbil chi yun yec'tok co k'inal.

6 ¹A bay yulyibank'inal ti' max wil junok tzet yetal chi uj co xol tol man mojak: ²A Dios chi ak'on beyomal, c'al is mimanbilal junok mactxel, ayxac'al masanil tzet chi yochej, palta tokwal chi beklay yak' tzalobjbok c'ul yin masanil juntzan tu', palta tol tx'ok junokxa mactxel ok yak' tzalobjbok c'ul yetok. A jun ti', caw wal man mojak, cax cusc'ulaltak co naoni. ³Caxc'al mi a junok winak ay junok ciento yuninal, cax chi ayji ec' xiwilok yabilal, ta c'am chi yak' tzalobjbok c'ul yin watx'il, toltax tamwal watx' ok yun mukayi. Ayin ti' chi wala' tol yelxac'al watx' yet junok eq'uil unin, yintak junok winak axca tu'. ⁴Caxc'al a junok unin axca tu', toc'al chi lajwi ayok, c'am bay chi binajcan jabok, ⁵caxc'al mi c'am chi yil jabok yakan c'u, tamwal ay tzet chi yojtaknej elok, palta a jun tu', tol chi xewi yintak jun winak tu', ⁶tol maj yak' tzalobjbok c'ul jabok yin tzet yetal watx' ay bay, caxc'al max ayji ec' yin junok cab mil abil. Axa yet chi lajwican apnok xin, jun lajanc'al chi yun tojcan bay cambal.

7A masanil co mulnajil chi junej, asanc'al yuj yoc yopiso yuj co mimanil, palta c'amc'al yechel chon can yin tol c'amxa tzet chi co na'. ⁸¿Tzet is watx'ilal junok aj nabal, yintak junok tol c'am is nabal? Ta ac'ala' meba' jun aj nabal tu', ¿tzet wal chi yi' yin yojtaknen el yion bey ba yin watx'il yetok yet animail? ⁹Yelxac'al watx' tatol watx' chi jab yuj tzet yetal ay ayon, yintak pax tol chi jochejc'al juntzanokxa tzet yetal. A jochwan tu' nabac'al, lajanxac'al axca tol chi jak' jip co mitx'on cak'ek'.

¹⁰A tzet yetal ay tinani', payxataxc'al c'oli binaji. A tzetbil yayji junok mactxel, ojtakbilxac'alta'a. C'amxa tzet watx' chi ji' yin, ta chi co teyelej co ba yetok junok mac ec'ban jintak. ¹¹A jun ti' yel toni: A bay xiwilxa k'anej chi al-layi, ay k'anej c'am yelapnok, c'am wal jabok tzet yetal chi ji' yin yuj xiwil co k'anjab. ¹²Tok ay junok mac yojtak tzet yetal watx' chi oc is watx'ilok, yak'ban ayic' bay yulyibank'inal ti'. C'am yelapnok co k'inal, lajanc'al axca junok enelej toc'al chi eq'uelok. Tokwal ay mactxel ok je' yalon ayon tzet yetal ok uj bay yulyibank'inal ti' yet mayal on cami.

Jak'ek jip yin tzet miman yelapnok

- 7** ¹Yelxac'al watx', tol watx' a binaji, yintak pax tol chi el jabil perfume manxa watx'ilok en.
Yelxac'al watx' jun c'ual yet chon cami, yintak pax c'ual yet chon alji.
- ²Yelxac'al watx' tol chon toj iloj ak'bal bay ay junok camich, yintak pax tol chon tojcan bay junok k'in, yujtol a camich tu', a' ayoc co lajubalok co masanil; watx' tatol chi co na yin yak'ban iquis onto.
- ³Yelxac'al watx' tatol chi cus co c'ul, yintak pax tol chon tzewi, caxc'al cusiltak yili co sat, palta chi watx'ji aj co nabal yuj.
- ⁴A mactxel aj nabal chi na' yin camich; a pax mac c'am is nabal xin, asan tol chi yak' nabal.
- ⁵Yelxac'al watx' ta chi co cha jab tenchebalej chi yal junok aj nabal ayon, yintak pax tol chon ilay aj can yuj junok c'am is nabal.
- ⁶A yet chi toj nuk' junok c'am is nabal tzewi, lajan wal axca pak'labi te q'uix yet chi tz'a'i, c'am wal jabok yelapnok.
- ⁷Ta a junok aj nabal chi etnen junok mactxel, axcaxac'al junok c'am nabal chi yut ba, ac'ala' jun mac chi chaon montebal tumin, ac'al oc chi yetnej el is beybal.
- ⁸Yelxac'al watx' yet chi lajwi ay junok tzet yetal, yintak yet chi chalay el yich.
Yelxac'al watx' yet mactxel tol chi tec'bajc'al ba, yintak pax mac jalan chi yut ba.
- ⁹Manchak a bek a ba yin tol c'un tit a chichonc'ulal, yujtol a chichonc'ulal tu' yet eb anima c'am nabal yayji ocok.
- ¹⁰C'am cha k'anlej ¿tzet yuj xan watx'c'al max yun beyc'altek yet payxa? man cachiok. A juntzan k'anlebal axca tu', a juntzan c'am nabal chi k'anleni.

¹¹ Watx' yet mactxel tol ay tzet chi sataknej, ac'ala' ay c'apax is jelanil.
¹² Yujtol a jelanil tu', chi colwaj bay mactxel tu', axca chi yun colwaj pax ch'en tumin, palta yelxac'al watx' jelanilal tu', yujtol chon ayji yin junc'ulalil yuj.

¹³ Chi cam wal eloni, tzet yetal chi watx'nej Dios: ¿Mactxel chi je' tojolnen oc tzet yetal tol coxan yayjican yuj Cham? ¹⁴ Ta watx' ayach, ak' tzalobjbok a c'ul; palta ta man watx'ok ayach chab xin, chi cam a naoni tol a Dios chi uten ca makanil tu', yuj tu' xan man jojtakok tzet yetal chi jayoc co satak.

¹⁵ A yin janic' in k'inal c'am yelapnok ti', max wil masanil tzet yetal. Ay anima tol caw wal watx' is nabal chi cami, ay pax anima caw wal yob is beybal, palta xiwil abil chi yil eb.

¹⁶ Yuj tu' xan manchak ach ec' yiban oten a ba watx'il, tamwal chach ec' yiban oten a ba jelanilal, talaj ayache'al oc chetnej a ba.

¹⁷ Manchak ec'xac'al yiban tol yob chot a ba, tamwal tol chot c'apax a ba yin c'am nabalil, talaj chi jayoc camich en yet c'amto chi ajapnok c'ual a cami.

¹⁸ Watx' chi jut co mitx'on waay co ba yin jun ti', c'am chi co bekil junxa tu'.

A mactxel tol ay yelapnok Dios yul sat, watx'c'al chi yun yelapnok yin masanil tzet yetal.

¹⁹ Chi ak'lay tec'anil junok jelan yuj is jelanilal tu', yintak pax lajonwanok eb yajaw ayoc bay junok conob.

²⁰ Palta xin, c'am wal junok mactxel bay yulyibank'inal ti' tojol, tol c'am bay chi oc is mul.

²¹ Manchak a cha ab masanil tzet yetal chi ali, axca tu' man yobok ok abej, tatol yob tzet ok yal eb a chekbej en, ²² yujtol ach ti', ojtak wali tol xiwil mi el yob c'apax chal yin junokxa mactxel.

Max beyc'ulnej masanil

²³ Yetok in jelanilal max in beyc'ulnej el masanil juntzan ti', yujtol ay wal oc yin in nabal tol jelan chin elocok. Palta c'am chi nachaj el wuj chi wabej. ²⁴ Tokwal chi nachaj el wuj masanil jelanilal yelxac'al miman yayji ocok, c'am mac chi je' nachaj el yuj.

²⁵ Max quin oc wal ijan wojtaknen elok, c'al in cuyoni, c'al in sayon ec' yin jelanilal, tzetbil yayji oc masanil. A wal max yun nachaj el wuj, tol yob satak Dios, tatol chi co pitnej co ba yin co c'am nabalil.

²⁶ Ay wal jun tzet yetal yelxac'al yob max ilchaj wuj yintak camich. A ton wal junok ix tol jelan yin yak'on ayc'ay winak, c'amxa chi beklay el yuj. A nak chi tzalaj Dios yetok, c'am chi ayc'ay yuj ix, palta a pax junok tol yobc'alta' is nabal xin, chi ayxac'al c'ay yuj ix.

²⁷⁻²⁸ A yin wak'on wip nachaj el masanil juntzan tzet yetal ti' wuj, xiwilc'al tzet yetal tol c'amtoc'al chi wiltek, palta a yin jun ti' xin, junnej winak tol ay yelapnok max ilchaj wuj xol jun mil winak. A pax xol eb ix ix xin, c'amto junok

ay yelapnok max ilchaj wuj. ²⁹Asan juntzan ti' max chaloj wuj: Tol a Dios, caw wal watx' max yun watx'jican anima yuj, palta xiwil tzet max saytek eb yiban.

8 ¹Asan junok jalan is nabal chi nachaj el yuj, tzet yelapnok masanil tzet yetal. A wal jelanilal tu' chi ak'on tzalojbok ajok, c'al yak'on tztetzon aj sat tol ow yili.

Ikemal bay cham rey

²Ikej masanil chekbanilej chi yak' cham rey, yujtol axca tu' max yun ak'on a ti' bay Dios. ³Manchak ach eltok satak cham rey tu' yin aymanil, tamwal cha tec'baj a ba yin junok k'anej yob yul sat cham, yujtol chi je' yunen cham tzet yetal tol chi cha' c'ul. ⁴Yujtol asan cham rey chi je' yalon junok lajub k'anej, tok ay mactxel ok je' k'anlen yab tzet yetal chi yun cham.

⁵A mactxel chi yikej junok chekbanilej, c'am tzet yetal chi tit yiban. A mactxel aj nabal, chi nachaj el yuj bak'in ok yunej, c'al tzet chi yun yikeni. ⁶Ay wal is mojalil tzet chi yun jikeni, c'al is c'ual, palta a tzet chon on xin ⁷tol man jojtakok tzet yetal ok ujok, tamwal ay mactxel chi je' yak'on jojtaknej elok.

C'am mactxel ay yikbej yiban camich

⁸C'am mac ay yikbej yiban yiquisal, yet chi mitx'on waayok. C'am mac chi je' tenon oc wanaj c'ual is camichal, yujtol a camich tu', axca wal junok owal c'am chi je' co colon co ba bay, tamwal junok yobtakwom c'am chi je' col-lay el yul k'ab yuj is yobtakilal tu'.

Ay tzet yetal tol c'am jabok yelapnok

⁹Masanil juntzan ti' max wila', yet max in oc ijan wojtaknen el tzet yetal chi uj bay yulyibank'inal ti', a bay ay anima tol ay yikbej ayocok, chi yak'balnej yikbej tu' yin yetnen yet animail.

¹⁰Max wilon c'apaxok, tol ay eb anima yob is nabal, a yet chi muklay eb, chi ilay can eb yuj eb anima. Axa pax eb anima ayilwom bay Dios, tok ayto mac chi naontek eb bay yul is conobal bay max yun eb xiwil tzet yetal watx'. A yuj juntzan ti', xan toc'al chi somchaj el co c'ul yuj. ¹¹Yujtol c'am chi alay oc yailal yiban eb yobtakwom yin aymanil, xan asanxanej yobtakilal tu' chi na eb anima yuneni. ¹²Caxc'al mi ay anima tol chi occ'al is mul, caw wal miman pax yabilal chi yila'; palta wojtak wali tol a mactxel ay yelapnok Dios yul sat, watx'c'al chi elocok. ¹³Axapax eb yobtakwom xin, yobc'al ok eloc eb, a yiquisal eb axcac'al junok enelej chi yun yeq'uelok, yujtol c'am yelapnok Dios yul sat eb. ¹⁴Palta xin, a bay yulyibank'inal ti', ay bay tol q'uexan chi yunej. Ay eb anima watx' beybal, chi yab eb yail, axcac'al tol yobtakwom eb, axa pax eb anima caw wal yobtakwom xin, caw wal chi yak' tzalojbok eb c'ul, axcac'al tol watx' eb. Ayin ti' chi wala' tol toc'al chi somchaj el co c'ul yuj juntzan ti'.

¹⁵Yuj tu' xan chi wala' tol moj wal tol chon tzaloji. A wal tzet yetal watx' chi jun bay yulyibank'inal ti', asan tol chon lowi, juq'uena', c'al

jak'on tzalobjbok co c'ul. Asan juntzan ti' chi je' jion yin co mulnajil chi yak' Dios ayon, yak'ban iquis on bay yulyibank'inal ti'.

¹⁶Max wak' wip in cuyoni c'al wojtaknen el tzet yailal chi uj bay yulyibank'inal ti', toltax ay mac c'am chi way jabok yet c'ualil, tamwal yet ak'balil. ¹⁷A max yun nachaj el wuj xin, tol masanil tzet chi yun Dios, c'al tzet yetal chi ec'tok bay yulyibank'inal ti' c'am chi je' nachaj el juj. Caxc'al tol chi jak' jip jojtaknen elok, palta c'am chi nachaj el juj. Caxc'al tol a junok aj nabal chi aloni tol jojtak, palta wal yel, c'am tzet chi je' jojtaknen elok.

A tzet chi jut co ba yak'ban iquis on

9 ¹Max in oc wal ijan yin in beyc'ulnen masanil juntzan ti', max nachaj el wuj, tol a yunben eb watx', c'al eb aj nabal, a yul k'ab Dios ayocok. C'am jabok jojtak eb tzet ay satak eb, ma tol camc'ulal ma xin ajc'ulal. ²Axa chi yuncan aj xin, jun lajanc'al chi yun yelcan apnok. Jun lajanc'al chi yun eb tojol, c'al eb man tojolok, eb watx' c'al eb man watx'ok, eb ayilwom c'al eb man ayilwomok, eb chi yak' xajanbal, c'al eb c'am chi yak' xajanbal. Lajanc'al junok watx' yetok junok yobtakwom, mac chi locbaj bi Dios, c'al mac c'am chi locbaj bi Cham.

³A xol masanil tzet chi uj bay yulyibank'inal ti', ay tzet tol caw wal man is mojak, a ton yujtol lajanc'al chi yun lajwi ay eb anima masanil. Yetok c'apaxok, a is nabal masanil anima, asan yin yobtakilal ay ocok, yak'ban iquis ec' eb, lemxic'al chi jay camich, cax chi lajwi.

⁴Yuj tu' xan yob jun tu', yujtol asan yet iquisto eb anima, chito je' naon ba c'ul eb. Watx'to wal yet junok tx'i' iquis, yintak junok no coj camnakxa. ⁵Yetok c'apaxok, a eb iquis, jojtak eb tol ok cam eb, a pax eb camnak xin, c'amxa tzet yetal jojtak eb, tamwal ayto tzet chi yi eb, toltax chi tojcan eb c'ayc'ulal yuj eb anima. ⁶A bay mukbanil camnak tu' chi lajwi is camc'ulal eb, is chichonc'ulal eb, c'al masanil yobtakilal chi yun eb, tok ayto bay ay yalon yet eb yin masanil tzet yetal chi uj bay yulyibank'inal ti'.

⁷Tonek, jak'ek tzalobjbok co c'ul yin co lobej, c'al yin juc'a', yujtol a tinani' chi cha' c'ul Dios tzet chi junej. ⁸Co pich co ba yetok sak pichilej. Jaoc perfume yanilok co jolom. ⁹Nabac'al masanil juntzan c'ual chi yak' Dios ayon, yuj tu xin, asan chon tzaloj yetok ix jetbi camc'ulnebil juj, yujtol asan jun ti' co satak yayji ocok, c'al co paktzebal yin co bilc'ulal bay yulyibank'inal ti'. ¹⁰A masanil tzet yetal chi je' co watx'neni, co watx'nejc'al yin masanil co c'ul, yujtol a bay mukbanil camnak bay ok on tokcanok, a bay tu' c'amxa tzet ok je' juneni, tamwal co naoni, c'amxa ojtakbilal tamwal jelanilal bay tu'.

A tzet man tojolok chi uji

¹¹Ay janic'okxa tzet yetal max wil bay yulyibank'inal ti': Man masanilok eb jelan beyi tol babel chi apni; man masanilok eb jelan yak'wi owal

chi ayc'ay owal tu' yuj; man masanilok eb aj nabal, watx' chi ec' tiempo yuj, man masanilok eb jelan nabal chi oc beyomal, tamwal masanil eb cuywinak, chi oc yin mimek ikbej. Junjunc'al yetok tzet chi chaloj yuj.

¹²Yetok c'apaxok, c'am mac yojtak bak'in ok apnok is yorail. Axca chi yun can no txay yul txim, c'al no tz'iquin yul yal, caytu' eb anima, c'am tzet naan yuj cax chi jayoc junok cawxinakil yiban eb yin jun bekal.

¹³Yetok c'apaxok, ay wal tzet yetal max wil bay yulyibank'inal ti', tol chi tx'oxtek junok miman cuybanilej: ¹⁴Max wil junok yaliñ conob, tol txennej anima cajan bay, axa junok rey tol xiwil is soldado max oc oyan yinlak yuj yak'on owal. ¹⁵Palta a bay jun yaliñ conob tu', a tu' cajan junok meba' winak, asan xin tol caw wal aj nabal. A yuj is yajnabalil tu', xan max mi je' colon el jun conob tu', palta tok ay mac max cha yabej c'al yikeni.

Ec'ban yelapnok jelanilal

¹⁶Caxc'al mi a is yajnabalil junok winak tol meba' tu', c'am yelapnok yul sat anima, xan c'am chi chalay ablay tzet chi yala', palta xin, ayin ti' chi wala', tol yelxac'al ay yelapnok junok aj nabal, yintak junok tol tec'an chi yut ba.

¹⁷Yelxac'al watx' jaben is k'anej junok aj nabal bay numumi, yintak pax jaben yel yaw junok reyal eb c'am nabal.

¹⁸Yel miman yelapnok jelanilal, yintak mitx'k'abej yet owal.

Yelxac'al miman tzet yetal chi etaxtok yuj junok anima man watx'ok chi yunej.

10 ¹A yuj junok no camnak aja' chi etax el jabil perfume manxa watx'ilok. Ca c'apax tu', ta a junok mac mimanbil yuj is jelanilal, cax chi yun janic'ok tzet man watx'ok, chi etax el is mimanbilal tu' yuj.

²A yochwan junok aj nabal, chi yaoc ba yin tzet yetal watx', a pax yochwan junok mac c'am nabal xin, asan yin yobtakil chi yaoc ba.

³A junok c'am nabal, a yin masanil tzet yetal chi watx'nej, chi tx'oxil ba tol c'am ton is nabal. Toltax eb man ojtaknenok, chi nachaj el yuj eb tol c'am is nabal.

⁴Ta a junok yajaw chi tit yowal en, manchak a k'anil a ba yin opiso bay ayach ocok. Ta che ay a ba, chi je' watx'ji ay a faltail, caxc'al miman yayji ocok.

⁵Ay wal tzet man mojak chi uj bay yulyibank'inal ti', a ton tzet chi el yunen eb yajaw. ⁶Yujtol a bay junok c'am is nabal, a tu' chi ak'lay junok opiso miman yelapnok; axa pax bay junok anima beyom, a opiso yaynakil chi ak'lay bay. ⁷Max wila' tol a eb mosejal, yiban chejxac'al chi ec' eb, axa eb mimek winak, chi bey eb axcaxac'al tol mosejal yayji eb.

⁸A mactxel chi watx'nen junok olan, ac'al oc jun tu' chi ayc'ay yul. A mac chi mak'on poj junok pared, axa no labaj chi chioni.

⁹A mactxel chi joswi ch'en, ac'al oc yin ch'en chi yasji. A mactxel chi pojwi si', ay is may chi yasji bay tu'.

- 10 Ta chi el ye ch'en echej, cax c'amxa chi niklay pax ye ch'en, yowalil mi tol yinxac'al ipejal chi yun tzoc'lay oc ch'en. Yelxac'al mi watx' tatol chi cam wal nalayi, cax chi watx'nelay juntzan tzet yetal tu'.
- 11 ¿Tzetto yopiso junok chi je' mansonen no labaj, ta mayal chilay yuj no'?
- 12 A is k'anej junok aj nabal, watx' chi al-lay yin yuj. A pax yet junok c'am nabal xin, toc'al chi titcan yiban yuj.
- 13 A yet chi chaon el yich k'anjabi, a k'anej c'am yelapnok chi yala', axa yet chi lajwi k'anjab xin, yobxac'al chi yala'.
- 14 A eb c'am nabal tu', xiwilxac'al tzet chi yal eb.
¿Mactxel chi je' yalon ayon tzet ok uj yet mayal on cami? Ilab tol c'am mac yojtak tzet chi jayoc co satak.
- 15 A junok c'am is nabal chi mak' c'unbok ba yin mulnajil, chi paxxac'al yip, ijan c'amxa chi je' meltzotek bay conob.
- 16 Ok'bal wal c'ul junok nación tol a junok unin chi yaoc is reyalok; axa pax eb yicham winakil conob, a bay k'in chi k'inibi aj eb.
- 17 Caw wal watx' yet junok nación, tatol ay junok is rey tol caw wal watx' nabal, axa eb icham winak watx', chi yun low eb yin yorail, yet chi oc yip eb, man asanok yin uq'uej an chi occan eb.
- 18 A junok winak tol isaj yin watx'nen yiban yatut, axa yet lananxa tz'ujli, ok lajwokxac'al ay yatut tu'.
- 19 A loj watx' toni, a uq'uej vino tzalojc'ulal c'apaxok, palta a yuj juntzan ti' xan chi ochelay tumin.
- 20 Manchak al k'umal cham rey, tamwal tol toc'al chi ec' yul a c'ul a naoni. Manchak al yobal k'anej yin eb beyom, caxc'al tol a tx'oklil ayach ec'ok, yujtol c'ojanc'ulal chi abchaji, axcaxac'al mi tol a no tz'iquin chi ion beyok.

11 ¹K'okaytok a lobej yul a'. Lajwi yeq'uel jayebok c'ual, cax ok ilchaj pax oj.

²Chi yal elapnok tol a tzet yetal ay ayach, pojic' xol eb ay cawxinakil, atac'ala' jantak chi je' oj, yujtol man ojtakok tzet ok tit yiban a nación ti'.

³Tatol k'ek yili asun, ok tit nab chi yal tu'.

Ta chi ayc'ay te te' bay norte, ma chi ayc'ay te' bay sur, a bay jun lugar bay chi ayc'ay tu', a tu' chi canxac'al canok.

⁴Tatol ok echbanejc'al watx'ji oc yulyibank'inal ti', ma yet watx' yec' cak'ek', ta axca tu' ok otej, c'am bak'in ok aw awoj, tamwal ay bak'in ok a waj sat awoj.

⁵Man ojtakok baytal chi ca toj cak'ek', tamwal ojtak tzetbil chi yun ch'ib junok unin yin is txutx, xan tom ojtak tzet yetal chi yun Dios, a ton Cham max ak'on pitzc'oj aj masanil tzetak yetal.

⁶Aw a babel awoj, cax chawon c'apax a tzunan awoj, yujtol man ojtakok mactet makanil watx' ok yunej, ta a babel awoj tu', ma a tzunan awoj watx' ok yunej, ma tol watx'c'al ok yun ca makanil xin.

⁷Caw wal watx' yili sakk'inal, watx' c'apax chi jil yakan c'u. ⁸Caxc'al mi xiwil abilal chela' palta yowalil chak' ep ak'on tzalojbok a c'ul. Chi cam wal a naoni, tol miman yabilal ok ach can bay cambal; c'amxac'al tzet ok e' bay tu', cax nabaxac'al toni.

Consejo bay eb ach'ej

⁹Tzalojanek ex unin anima, a wal tinani' tol tec'an e waayi. Ak'ek tzalojbok e c'ul yin tzet yetal tol watx' yak'ban chi je' e yuj, bekanokab e c'ul e toj bayc'al chi tit yin e c'ul, c'al yuj tzanc'al tzet che yila', palta chi cam wal e naoni tol a Dios ok k'anlej yab ayex yin masanil tzet che yun tu'. ¹⁰Najat che yiel e nabal yin bilc'ulal, cax c'am chex oc il yuj junok yailal yin e mimanil, yujtol a unin animail jun bek chi eq'uelok.

12 ¹Naektek Cham mac max ex watx'neni, yak'ban unin anima exto, yet c'amto che chalej e ba yetok yabilal tol yinxac'al yatakilal ok yun yec' e yuj. A wal yet ok jayoc juntzan abil yet ok e yalon axca ti': C'amxa watx'il yet iquis on ec' ti', quex chixac'al mi. ²Naektek Cham tinani', yak'ban tol watx'to e yilon yakan c'u, yakan xajaw c'al waycan, yet c'amto chi aj can jay txololok yailal. ³Axa ok yunej, a e k'ab chex colon tinani', toxac'al ok bilok, a e yakan tol tec'an waayi ok pax yip. C'amxa c'apax e ye yin e cach'on e lobej, manxa ok low c'apax e sat yin watx'. ⁴A yet ok apnok oc juntzan c'ual tu', manxa ok e yab tzet ok uj yul calle, tamwal ok e yab bil ch'en ca'. Iquis exxa yet chi ok'aj no tz'iquin, nabaxac'al ok oc son e satak. ⁵Ayxac'al e xiwc'ulal bay junok can ay ajok, ayxac'al is may e yec' yulak be.

Axa c'oli sakbi xil e jolom, c'o'janc'ulalxac'al e yec' matxlabok, c'amxa c'apax tzet ok e na yin e yetbi, yujtol lananxa e toj bay e cajlobal yin junelnej; axa bay yulak calle, lananxa yok' eb chi ok' yuj is camnak.

⁶Naektek Cham e watx'nemal, yak'ban wal c'amto chi nic'chaj e cadena tol plata, tamwal tol chixa poj c'apax tok jun xij tol oro. Yetok c'apaxok, c'amto chi pojtok tx'otx' moc bay ti a' aej, c'amto c'apax chi nic'chaj tok'banil ajtek a' aej yul olan. ⁷Lajwi tu' axa e mimanil ok occan pokokal, ok tokcan bay sat tx'otx', axcac'alta' yayji yet yalantok, axa e yanimail xin, ok tojcan bay Dios Cham max ak'oni.

⁸Ayin chin k'anjab ti', chin ca alnej: ¡Nabac'al ton masanil, cax c'am yelapnok!

A juntzan lajub k'anejaj

⁹A wal yet max aj can in jelanil, xiwilxa tzet max wak' yojtaknej el eb wet animail. Yetok c'apaxok, manxa wal k'anejok max waoc yin in c'ul in cuyon yin txolilal. ¹⁰Caw wal max in say wal k'anej tol watx'xac'al chaon ba, yet chin tz'ibej juntzan k'anej tol yel axca wal is mojalil.

¹¹A tzet yetal chi yal eb jelan, lajan wal axca junok ch'ebalej, a yet mayal cha ba juntzan k'anej tu' yin txolilal lajan wal axca estaca tol caw chi yun mak'lay ayok, tol ak'bil ayon yuj junok jilomal. ¹²Ach wuninal, chi cam eloni, man comonok cha cha ab juntzanokxa k'anej, yujtol a watx'nej eltek libro c'am is lajubal; yetok c'apaxok, ta xiwil chon cuywi yin, chon ispay aj yin.

¹³Caytu' chi yun lajwi jun k'anej ti'. Mayal al-lay masanil. Ayokab yelapnok Dios yul co sat, jikejokab is chekbanil, yujtol a jun ti' yowalil chi junej. ¹⁴Yujtol a Dios ok k'anej yab ayon masanil tzetak yetal chi junej, tac'al watx' ma yob, caxc'al mi yin ewantakil max junej.